

fuy. Le vent estoit ouest, & ouest quart au Nord, de maniere que la glace flotta bien fort vers l'Est.

Le 29. de Juin, le Soleil estant vers Sudsudouest, revindrent les deux susdits Ours, au lieu ou estoit l'Ours mort: desquels l'un print par les dens l'Ours mort, & l'emporta assez loin par l'inegale glace, & en commencerent a manger. Ce que nous voyans, avons sur eux dechargé vn mufquet: lesquels oyant le son, sont incontinent fuy, quittas l'Ours mort. Apres nous 4. y sommes allez, & trouvames qu'en si peu de temps l'avoient a demi mangé, lors prinimes le reste, & l'avons mis sur vn glaçon eslevé, de maniere que le pouvions veoir de la barque, a fin de les pouvoir harquebuser, en cas qu'ils revindrent. Nous trouvames aussi la grande force de l'Ours, qui si facilement avoit emporté l'Ours mort, comme si ce n'eust esté rien: car entre nous quatre avions assez a faire a lever en haut le demi Ours: Le vent estoit ouest, qui chassoit bien fort la glace vers l'Est.

Le 30. de Juin au matin, estant le Soleil presque a l'Est quart au Nord, la glace flottoit aussi fort que devant a l'Est, par le vent d'ouest: & deux Ours vindrent flottans sur vn grand glaçon, qui se preparoyent pour nous assailir, allans ca & la, comme s'ils eussent voulu entrer l'eau, & venir vers nous: mais ne le firent pas: parquoy avions soupçon que ce furent les mesmes Ours qui par avant y avoyent esté. Mais le Soleil estât Sudsudest, il y vint vn autre Ours par la glace ferme ou nous fusimes, tout droict vers nous, lequel nous approchant & oyant quelque bruit, il l'en est retourné. Le vent estoit Ouestsudouest, & la glace commençoit vn petit a retirer: mais par ce que le temps estoit brouillart; & qu'il venoit fort, nous n'osames mettre les barques en l'eau, attendans melieure opportunité.

Le premier jour de Juillet, le temps estoit par raison bon, & le vent Ouestnordouest. Au matin estant le Soleil presque a l'Est, y vint vn Ours de la glace flottante, nageant vers nous, qui fusimes sur la glace ferme: mais quant il nous ouyt parler, il n'aprocha pas plus pres, ains l'en fuyt. Le Soleil estant presque Sudest, la glace vint si rudement nous aborder, que la glace ferme sur laquelle nous, la barque, & les denrees furent, se vint a rompre en plusieurs pieces,

*Pourtrait comment nous avons par necessité grande, a cause de la glace flottante apportee, les meubles de hors les barques, & aussi les barques sur la glace ferme, y faisons vne tente, a fin de reposer vn petit en icelle, ordonnans vn hamme pour sentinelle, & comment a la minuit vindrent vers nous trois Ours, desquels l'un fut harquebusez, & les autres s'enfuyrent: lesquels le lendemain revenans, emporterent assez loin l'Ours occis, & mangerent vne partie: lesquels furent depuis par nous enchassez.*

